



Vol. 60 No.04

October, 2021

HINNA THAH



KUMPUAN

“LALPA DIINGA PHATUAMNGAI”

Tita 2:14

Editorial Board

Editor

Rev. Thangkhanlal Hangluah
(7005433057)

Joint Editors:

1. S. Pauchinlian
(9597515230)
2. Hh. Khaizathang
(7005689071)

Subscription Manager

L. Ginsuanmung

Contribution Editors:

- Rev. B. Nengzachin
Rev. T. Chinkhangen
Rev. H. Kamkhanlal
Rev. T. Danial
Rev. P. Khamthianmang
Rev. Paukhochinjam Thangsing

NTBCA Office contact no.
7630096496

contents

- Editorial.....01
- Lungsiatnain sualna tampi akhuhkhum hi03
- "Je-etna khelah hinna lallukhuh aum hi06
- Jesu chau kasa deuh ve!09
- Ka liim in taau bulh sel-sal12
- Thuhun Lui zawlneite leh a zawlnei natoh hun a kumpite13
- Babel insang apan kihasotna16
- Jesu'n nang kawm ah bang a soi ei?18
- George Whitefield tanchin.....20
- Ginna28
- HBCH.....30

Hinna Thah laah man kum khatin

By Hand = Rs. 150
By Post = Rs. 200

Email Id: ntbc@ yahoo.com

Thusuah photmah Editor ngaihdaan
ahi veh sih, a suahtute'n moh
akipuaah diing uhi.



NA PIANGTHAH TAI?

Rev. T. Danial, Director of Mission, NTBCA

Thuphuandoh 1:7 i simleh “Jesu ahung kiit chiang in mit chinteng in amah amu diing” chih a kimu hi. Kum 20 paita i nung etkiitleh tulai a Media (technology) ineihte uh ana um nai siha, hi Bible chaang in a geen uut heetsiam ahahsa hi. Dotna ana um chu, ei Manipur a tengte'n Jesu Olive taanga hung kumsuh bangchih muh diing ade aw chiin, i ngaihtuahna in ana baan pha sih hi. Ahiin, kum pai sa kum 10/20 sung vel in technology lama khantouhna nasatah mei ahung tunga. Tuin mit chinteng in amu diing chih chu sil limdang talua ahi nawn sih hi (Online-Youtube, Zoom meeting i neih bang uh ahita diing chihna ahi). Khovel a siltungte chu i umna mun mun ah baihlam tahan ihe in i mit ngeiun i mutheita uhi. Tuhun chu sil khat himhim baihlam taha bawltheih leh muhtheih ahita chihna ahi. Huh ahihna ah, mission natohna zong malai saang in baihlam taha septheih ahung hita hi. Thunatong masate in a puanlom te uh pua in khua khat apat khua dang a tungna diing un a daahkaal bang, ani bang ana subei va, himahleh mite nual bang ana thuah/tuah nalai uhi. Himahleh tuhun a gingtute i hamphatna uchu Lamka toh Thanlon zong ni khat in nuamtahin i ki leh jou va, Guwahati toh Lamka bang a daahkal in zong i tung theita uhi. Khovel khantouhna in silbangkim a awlsam sah mahmahta hi. Alehlamah sil himhim a baihlam taah jiahin a sep lam saang in a soi lam a kisiamvehta chihzong aum thei hi. Bangteng hileh khovel khantouhna in sil bangkim a baihlam sah a Pathian natohna zong a baihlam sah a, Pathian natoh zong a thanop huai a, a tongtute zong ahampha uhi.

Ahiin, pianthahna dihtah neiloua Pathian nna hahsep a sepkhaah theih ahi. Khristian ihihna uh kum 100 ihih nungva a nam a etin 100% Khristian ihita uhi. Ahiin, i gamsung dinmun etin, i kouhtuam hagaulam a khantouhdan etin pianthahna/hutdamna dihtah neilou tampi i um nalai uh chih achiang hi. Koi pa aha khat in Lamka khopi a Khristian dihtah khat zong aum sih

diing achi a, mahni ki etchian na diing in chu ahoih mahmah hi. Thusoitu khen khat in Lamka khopi chu Bible a Sodom leh Gomorrah toh a tekaah jeel va, ahiin Lamka sunga mi dihtat, ginna a mi hangsan, thuummi bangzat aha khat i nei nalai uhi. Tuni in dotna poimohtah ikidot diingva hoih chu pianthahnna/hutdamna dihtah mimal in kanei ei chih ahi. Houtupa Rev. Khaizakham in Sawlleh Paul tanchin a soina a Paul in kum 20 nung in zong Gamoptu Agrippa maiah Jesu Khrist toh akimuhna (pianthahnna) chiantah in a soi thei nalai hi achi hi. Tuni in ei gingtu ka hi kichite in i pianthahnna hun zong soi theilou tampi i um diingva, i pianthahdan zong helou, piang zong piangthah khaloute ihi kha diing uhi. Hujiahin tuni in simtute/gingtute Pathian nna baihlaamtah a toh/sep theih ahita chih ihe a, Pathian nna zong isep theih tan in i seemta va. I sep pumpum in mahni kidot diingga poimoh mahmah chu; Pianthahnna/hutdamna dihtah mimal tahin i nei ei? Midangte pianthahnna i-awlmoh leh gingmoh bang in mahni pianthahnna ki-awlmoh leh gingmoh a Pathian toh kichimatna dihtah nei diing in mimal in i ki-enchian diing uhi. Simtute na bawn un Lalpa'n amah toh kichimatna dihtah nei diing in hung umpih ta hen. Kipaah ing!



Samaria numeinu'n a kawmah, "Bangchidaana
nang Judami in kei Samaria numei kawma tui
dawn diing na hung nget ahiai?" a chi hi. Ajiahchu
Judeate'n Samaria mite toh kizopna bangmah a
nei sih uhi. Jesu'n adawng a, a kawmah, "Pathian
silthawnpiaah leh na kawma, 'Tui dawn diing hung
pia in,' chipa koi ahiai chih he lehchin zaw, nang in
a kawma ngeen diing chin a, Ama'n nang tui hing
hung pe diing hi a," a chi hi.

Johan 4:9-10

LUNGSIATNA IN SUALNA TAMPI AKHUKHUM HI

Gialtu: Pastor Muanlal Guwahati

Text: 1 Peter 4:8, “*Huleh silbangkim tungah phatuamngaitahin ki lungsiat tuah chiat un; ajiahchu kilungsiatna in sualna tampi a khuhkhum hi.*”

Tulai khovel in zong adeih leh a mamoh zing chu Kilungsiatna ahi. Bangziah a deih leh mamoh i hiai i chihleh hih kilungsiatna in sualna tampi a khuhkhum ziahin i mamoh chiat uhi. Sual jiahin aki iit diingte ki iit lou in i um va, sual ziahin khat leh khat kihuatna i neih khava, sual ziahin kumtuang gawtna tang diing in bawl i hung hita uhi. Hibang lawm a gu haat zoh theihna lampi chu lungsiatna neih ahimei hi. I ma va Khristian khovel a Pathian natongtute'n hi bangin ana taangkoupih uhi.

Khatna Ah I heutulian Jesu Thusoi Gen Masa Ni

John 13:34 “*Thupiaah thah ka hung pia hi,khat leh khat kilungsiat un; Ke'n nanguh ka hung lungsiat bangin, nanguh jong khat leh khat kilungsiat un. Khat leh khat na kilungsiat u'leh mi jousiahin ka nungjuite nahi uh chih hikhu ah ahe diing uhi,achi a.*” Jesu thusoi apatin

chiamteh diing poimoh tah aum hi.

A). Jesu i lungsiat tahtah leh thupiaah thah ahung pia i juih diing ahi (Jesu ka hinkhua thuneih peen lalpeen ahi i chihleh a thupiah thah juih diing ahi)

B). Jesu in ei ahung lungsiat bang a midang lungsiat diing ahi (Hinkhua neih ngeingeei diing ahi).

C). Jesu nungjui i hihna hung chiang pandiing ahi, lungsiatna i neih chiang in (Jesu jui ka hi chih midang heet i ut leh mohpuah na liantah i nei uhi). Hu mohpuahna chu Amah hung lungsiat bang a midangte i lungsiat diing ahi. Mother Teresa in hichibangin agen hi “*Mihing zousiah ka et chiangin Jesu ka mu hi. Huchiin kei le kei kihou in. Hichu a gilkial hi Jesu ann ka piaah diing ahi. Hipaku adamsh a phaah avei hi, ka sil siang diing a ka kep hoih*

diing hi, Jesu ka lungsiat ziahin hihaw ka bawl diing achi hi." Hinkhua a Jesu lungsiat miten lungsiatna natoh i bawl diing mawng uh ahi.

Nihna Ah John (Lungsiat John) In Hibang In Lungsiatna Ahung Gen Jel Hi

I John 4:11 "Deihtahte, Pathian in hichilawma ahung lungsiat leh, eihaw jong khat leh khat i kilungsiat diing uh ahi. v7 Ajiahchu lungsiatna Pathian a kuan ahi; huleh michin lungsiat siam phot chu Pathiana piang ahi a, Pathian ahe hi. John in hichi ahung genchian nalai hi. "Mi'n Pathian ka lungsiat chi ngaala,a unao amuhdah inchu mi juau ahi; ajiachu amuh gegu a aunau bawn lungsiat loupi'n amuhlooh Pathian bangchi'n a lungsiat thei diai?" John in lungsiatna chu ei apat hung kuan hilou in Pathian apat achi hi. Mi lungsiatna hau i chih te khu Lungsiatna neitu Pathian giltah a ahinkhua va aneih ziah uh ahi.

A Thumna Ah Sawlleh Paul In Lungsiatna Hibangin Ahung Gen Hi

Ephesite 5:2 "*Khrist in ahung lungsiat a, ei u'diinga Pathian kawma silpiaah leh kithoihna*

namtui diingga akipiahang bangin, lungsiatna ah um un." Paul in lungsiatna bukimna kaankhawmna ahi achi hi. Leitung i damsungin bukim (perfect) iut chiat va ahoih mahmah hi. Ahihvangin hu bukimna i neih theihna um sun chu lungsiatna neih ahi.

I Bible chang pansan ah lungsiatna in sualna akhuhkhum hi Peter soi apatin igen nalai diing hi.

Peter in gamtuam tuam a Khristian kithehdalh mivaithaamte kawmah hibangin lungsiatna thu ana taangkouhpih hi.

1) Phatuamngaitahin khat leh khat lungtang siangthou in kilungsiat tuahun(1:22)

2) Unaupihte lungsiat un (2:17)

3) Unaute kideihsahna vah lungsiatna hal un (II Peter 1:7)

4) Sil bangkim tungah phatuamngaitahin kilungsiat tuah chiat un (I Pet 4:8)

Peter in Jesu lungsiatna athei chian mahmah mei hi. Ngaihtuah mah dua le Jesu in muhsitna tawpkhawh a tuaah a, beidong tah mei in panpih ngai in aum hi, hu lai tah in Peter in akiheetmoh bawl

hi. Jesu a diing in chu Peter mawngmawng gingta nawn sing hibang a ahung zuau san mai chu chih theih tham ahi. Hijongleh Jesu in a lungsiatna adai sah sih hi. Hujiahin Peter in a lungsim giltah a Jesu lungsiatna ahung theih chet chiangin ken jong hu bang a ka mihing batpihte ka lungsiat diing chi in amah thutanna alaah chiang ah koihdap lou in Ponta gamte, Galatia gamte, Kappadosia gamte, Asia gamte leh Bithinia gamte leh tuhun a Khristiante kawmah ahung hesah hi. Bangjiah a hibang lawma taangkouhpih ahiae ichihleh, Lungsiatna in sualna tampi akhuhkhum manpha leh thupi ahihdan a hinkhua ah a tangkhaah ziahin mi jousiah bawl diing in ahung deihsa hi.

Pathian natong khat in hichiin a soi hi, “*Lungsiatna, kilungsiat tuahna ichih khu ei hung lungsiattu Pathian hung lungsiatna hinkhua a mahni mimal tah (personal) a hechian mite'n lungsiatna, kilungsiat tuahna delh in a delh thoh zing uhi achi hi.*”

Unaute Pathian hung lungsiatna gelmah dua le? Pathian toh mihing kimeelmat na Kumtuang kumtuang a gawtmun gimthuahna mun

a umden diing a belguat te, Kumtuang kumtuang a Pathian toh kilem thei nawnlou himhim diingte, Pathian mitmuh a hoihna, felna, chitna, himhim neilou te, Ei hahpang ziah a Pathian toh kilem thei nawnlou himhim te, hihaw zousiah i dinmun ahihlaein Pathian hung lungsiatna jiahin jaleen leh suahtatna i tang uhi. Lungsiatna jiahia i sualna tampi khuhkhum ahitaah man in, hu lungsiatna mah in eite zong khat leh khat i kilungsiat hun chiangun khat leh khat sualna i kingaidamtuah theita diing uhi. Solomon in zong Lungsiatna in sualna jousiah akhuhkhum hi (Thupil 10:12) ana chi hi.

Pa in ei uh ahung lungsiatna dihtah i hinkhua vah itang tahtah leh hu lungsiatna vang a sualna jousiah a hung ngaihdam bang a, enjong midangte i lungsiatna jiahia i ngaihdam diing khu i mohpuahna ahi. Jesu i lungsiat leh athupiaah thah i juih diing khuh mohpuahna i nei hi. John, Peter leh Paul te'n Pa lungsiatna manpha atang ziahun Lungsiatna thu mah hinpih ahoihdan ahung hilhta uhi. Lungsiatna dihtah in sualna ngaihdam zoh louh anei

sih hi. Pathian hung lungsiatna i mu a, Jesu hung lungsiatna itan a, malai a sawllehte i ngaihsang leh i lungsiatna khu i mihing batpihte sualna zousiah khuhkhum zou ta diing in hung panpih in chi in mahni in kilaanthah chiatni. Simtute jousiah Pa Lungsiatna manpha tang diingin hung malsawmta hen.

that thei ahihziyahin. Lalpa lungsiatna itan peen i mihing batpihte sualna zousiah khuhkhum zou ta diing in hung panpih in chi in mahni in kilaanthah chiatni. Simtute jousiah Pa Lungsiatna manpha tang diingin hung malsawmta hen.



“JE-ETNA KHEEL AH HINNA LALLUKHUUH AUM HI”

By: Pastor David, NTBC Bangalore

Gingtu Khristian hinkhua chu Khrist nungjuihna ahi. Jesu Khrist ngei zong khovel a a lenlai in je-etna lam tuamtuam ah ana thuaah hi. Ei gingtu Amah nungjuite'n zong je-etna i tuah diing uh chu sil limdang ahi sih a, ahi diing mawng bang ahi. Huleh limdang I sa sih diing uhi. Gingtute'n je-etna i tuah diing mawng uh ahih banah, je-et a na um chiangin na bawl dih ei ahihlouhleh na bawl dihsih ei chih etkhiatin I um uhi. Hizongleh a hasotna chu je-etna thuaah mualsuah diing i hih banah a gualjoutute diingin lawmman guatlawhsa

in aum hi. Hilehzong Gingtu je-etna tuah khalou chu gingtu tahlou leh lemching ahithei hi. Bangjiahin ahiai i chihleh gingtulou chu abawl dihlousa (Sual) ahihjiahin je-et angai nonsih hi. Je-etna toh kisai Jakob 1:12 apatin I en diing a, Bible in “je-etna kuhkaltaha thuaah mi ahampha hi; Ajiahchu etkhiata aum zoh chiangin Lalpa'n Amah lungsattute kawma piaah achiam hinna lallukhuh chu amu diing hi” ahih chu bangchileh ei gingtute'n zong I tangkha thei diai chih I enkhawm diing uhi.

1. Je- etna bang chi thuaah diing ihi vuai?

Gingtute chu je-etna thuaah diing ihih daan ahung hilh chauh hilouin athuaah diing daan zong ahung hilh hi. I chaang teelin je-etna aum chiangin kuhkaltaha thuaah diing in ahung deih hi. Kuhkaltaha thuaah chih umzia chu pang tuntun ahiloulleh bawl tuntun chihna ahi. Gingtu khat chu je-etna a I bawl khiallouna diingin amo suala I puuhlouna diinga I pang tuntun uh a, sual chu I dou tuntun uh apoimoh hi. Je-etna um diing I heetsa mah bangin gualjoh theih ahi chih he in sual douna lamah kuhkaltahin I pang zing diing uhi. Tahsa uutna sualbawl diingin nichin hunchin ni heemin ummah zonglei, Lalpa'n kipaahman ahung chiam tang ngeingei diingin kuhkatahin I pang diing uhi. Huleh kuhkaltaha sual tunga gualjou diingin Lalpa'n gingtute ahung deih hi. Hujiahin Lalpa deihna bangin je-etna ah gingtu zousiah kuhkaltahin I pang zing diing uhi.

2. Bang diing a je-etna thuaahthe hampha ahi vuai?

Gingtute'n je-etna kuhkaltaha i thuaah theihna diing in

Lalpa Jesu Khrist I lungsiat uh apoimoh hi. Lalpa adiinga na silbawl zousiah chu Amah na lungsiat jiahin ahi a, humah bangin je-etna zong kuhkaltaha I thuaah theihna diing chu lungsiat jiahin ahi. Eite'n Lalpa I lungsiat masasih a, himahleh Aman eite ahung lungsiat masat jiahin lungsiatna thuhkiit chu ahahsasih hi. Ajiahchu Aman hun chinin ahung na lungsiat jouta hi. Hizongleh Lalpa na lungsiatlouh in chu je-etna ah kuhkaltahin athuaah jousih diing a, heem puuhpahin na um diing hi. Ajiahchu na lungsiatlouh a diingin bangchiin kuhkaltahin na pangthei diai? Lalpa I lungsiat tahtah hi chih suhlatna in je- etnate chu kuhkaltahin na thuaah mualsuah diing uhi. Dotna poimoh chu Lalpa na lungsiat ei? Gingtute'n Lalpa i lungsiat tahtah leh Lalpa min a gualjou diingin kuhkaltahin je- etnate a thuaah mualsuah diing uhi.

3. Bang diing a je-etna thuaahthe hampha ahi vuai?

Lalpa'n gingtu je-etna thuahtute hampha ahung chi hi. Ajiahchu je-etna thuaahthe chu Lalpa a ngaihsah chihna ahijaw hi. Huleh je-etna i

thuaahtah chiangin I hagau lam dinmun ahung hesah a, ahung supiching zaw hi. Ajiahchu je-etna tungah gualjou jeeltu chu gingtu masawn leh hagau lamah khangtou ahijaw hi. Huleh gingtute je-etna kuhkaltaha thuaah joutute ahamphatna seem chu Lalpa'n kipaahman ahung achiam hi. Gingtute'n je-etna kuhkaltaha I thuaah chu mahni kisiam hoihna diing ahih banah Lalpa'n Hinna lallukhuh ahung pe nalai diing hi. Lalpa a diinga thuaahtu bangmah zonglei ei mahmah in kipaahman hinna lallukhuh I mu diing uhi. Hu hamphatna leh kipaahman hinna lallukhuh jiahin gingtu zousiahin je-etnate tungah gualjou diingin kuhkaltahin I pang diing uhi. Huleh tang

ngeei diingin gingtu zousiahin pan I lathah chiat diing uhi. Lalpa'n gingtu zousiah chu je-etna thuaah diingin ahung hilh a, je-etna thuaah mualsuah diing daan zong ahung hilh banah bangchi thuaah zoh diing chih zong ahung hilh nalai hi. Huleh je-etna khelah hamphatna leh hinna lallukhuh i muh diing ahung chiam nalai hi. Hujiahin gingtute'n nichin a je-etna I thuaah te uh tunga gualjou diinga pan I laah diing uh ahi. Hinna lallukhuh piaah ahung chiam I tan theihna diing leh Amah I lungsiat hi chih suhchianna diing in je-etnate kuhkaltahin i thuaah mualsuah diing uhi. Lalpa'n simtu zousiahte gualjou diingin hung panpih chiatta hen.



*Ka unaute, je-etna chi tuamtuam na tuaah chiangun
kipaahna ngenin ngai un, ajiahchu na ginna uh
etkhiahna in thuaahtheihna a siam chih na he uhi.
Bangmah tasamloua na bukim va, huleh na buching
theihna diingun thuaahhaatna chu a bukimna
tongdohsah un.*

Jakob 1:2-4

JESU CHAU KASA DEUH VE!

By Lian Hangluah

Jesu leitunga a lenlai in, mittaw a sudam chi i thei hi. Mipi gilkial sangngate tanghou nga (5) le ngaa (Fish) nih in a a sutai a, bawm sawmlenih a vaal nalai hi. Athupi mahmah kiit chu numei kum sawmlenih si pawt khat a sudam hi. Hubaan ah a sil limdang bawlte laha thupi kasah peen chu misi, amin Lazar, a kaithou hi. Hite jiah in Jesu Khrist chu Pathian ahi chih gingta in mi tampite'n a juui uhi. A diah in, anasep thupite leh a silbawl theih nate miteng in theiden sih zong le uh a nungjui sawmlenihte in theiden diing uhi. Hichituh a silbawl thei zenpi , hunkhat a Jesu Khrist hi ‘iiplah’ huaitah in a hung gamtang hi. Gethsamane huan ah Rome sepaihte'n a mat un chu a nungjuite in a iiplah mahmah uhi. A lungsimva , “Mittaw na suhdam a, misi na kaihthohte bang in tu in jong na silbawl theihna (tulai haam in ‘magic’) sulang ve” chi diing un ka gingta hi. Jesu Khrist inlah bangmah genlou a, Rome sepaihte akimatsah phet in chu nungjuite in chu chau sa

mahmah diing uhi. A langkhat lamah, lungkiatna tawpkhaw in a um diing uh. Bang jiah in e? Pathian chia a juih pa un sihsan diing, mabaan a koi juui ta diing? Jesu Khrist a kimat bang in a nungjuite jong awl a hung kiman a, sing khros a kikilh diing un jong akingtinga diing uhi. Lungkiatna, lungthahna toh Jesu Khrist chau sa a, mohsahna in a dim diing uhi.

Tutung EURO 2020 football kimawlna ni nihni, nisim 12th June 2021, Kiginni in Copenhagen ah Denmark toh Finland kimawl uhi. Hi kimawlna a Denmarkte player minthang Christian Eriksen, Jersey no. 10 , silhpa kimawl mi tampite etnop peen ahi. Mite kinep bang in Eriksen jong goal khum tum in hahpang in pang hi. First Half ma in Denmark in neh mahmah uhi. Ahi in First Half bei ma deuh Minute 42 in Denmarkte player muan Eriksen lungphu khawl (cardiac arrest) in field a hung puhsuh hi. Thakhat in, a team pihte amel uh a nguai a, a kap jong a um uhi, a ngaihzawgnu

(khenkhatte'n a zi achi uh) bang a kahlim ethah himai. Ball peh enteng lungsim khoih diing in ka gingta hi. Adiah in Eriksen team te'n 'mabaan I kimawlsiam (star player) pa uh umlou diing bang chi kimawl ta diing viai?' chi'n a lung uh ke diing in ka gingta hi. Kimawl dahkhal khat leh kim valdeuh dinkhawl a um nung in team nih tegel lungkituahtaha deihtelna uh bang in kimawl a hung sunzom kiit uhi. Second Half tan chianga chu Denmark in kimawl awlawl in ahung lel pan hi. A langlamte uh Finland te'n goal khat a hung leh khum zaw sop uhi. Ahi'n kisuhkimthei na diing hunlemchang khat Denmark in amu hi. Huchu, penalty peh thei diing in a um va, ahihvang in penalty pehtu Wieghorst in goal a khum louhjiah in a guallel uhi. The Times of India gendan in Eriksen adinmun hoih deuhta a, ahi'n hospital a umden phot nalai diing ahihdaan gen hi.

Khovel ah mihing I hihna dawl a i mihinpihte lah ah jong i muan diah um hi. A tunga football pehte I et le Denmarkte'n Eriksen muang/ suang un, EURO 2020 kimawl na a zong saupi tunpih

diing in zong gingta uhi. Ahi in, a mi muanpa uh kisuhkha jiah in a mabaan diing uh gen hahsa sa uhi. A kimuanngamna (confidence) uh jong a kimawl masatna vapat kia hi'n kilang mawh hi.

Huchimah bang in mihing a hung piang Jesu Khrist hi sing Khros a hung kikilh hial in jaw a nungjuite lungkia le mangbang in a um uhi. Langkhat lam a Jesu Khrist bang chau sa hial uhi. Ahi'n hoihtah a I et leh Jesu Khrist leitung hinkhua ah thilbawltheihna (power) a neih hun chauh a amah muang diing hilou ahihdaan a langsah hi. 'Chau' i sahna peen eite khovel a i hahsatna te hung theihpih leh hung thuahpih ahihdaan a hinkhua apat hung sulang ahizaw hi. Mihing a hung piang ahihna a mihing hahsatnate a theihpih a (John 11:35), mihingte tahsa gilkialna atheihpih a (John 6:1-12), hitobang hahsatna neite panpih thei diing ahihdaan a hinkhua mahmah a sulang hi (Heb. 2:18). Hujiahin Jesu chau i sah vangun, a chau hilou in eite'n amah hung khotuahna theisiamlou ihi jaw hi. 1992 in Barcelona a Olympic ah kitaidemna ah British mi Derek Redmond zong hung kihel hi.

Hi mipa 1991 in zong 4X400 ah zong Gold Medal ana ngah kha ngeita hi. Hi Olympic ah 400m race Semi-final a hung taipan hi. Haat deuh in ahung tai a, a kielpihte a hung delh phaphei hi. A zohna diing gual (finishing line) apat 250 m vel a gamla ahung tung in a zadang thagui (hamstring) hung tan in , awlawl in a baai phei hi.A gal apat puanaah kangsilh leh tawka tom tengkhat in enzoulou in a hung delh phei hi. Security te'n hi mipa a mat tum vangun a mantaang jou sih uhi. Huchiin hi mipa in Redmond kawmah, "Tawldam in bawi, bang diing a baai leklek na hiae?" achile, Remond in , "Baai mah zongleng a zohna gual tan taitung diing kahi" achi hi. Hu in mipa in, "Huchi ahihle, kei toh taitung khawmnii" achi a, huchiin Derek khut a liang a baat in a zohna gaultan a taitung uhi. Hi puanaah kangsilh pa koidang hilou in Redmond pianna' PA ahi. A taitung zou un stadium a um mipi 65,000 te'n dingkawm in zahtatna khutbet (standing ovation) a pia uhi. Redmond in medal alah louh vang in mipi lungsim a luahzou hi.

Hi Derek Redmond te mata tanchin kamuh chiang in hagaulam zillai a hung pia hi. Redmond hahsatah a baai kawma a tai lai in a pa a kawm a um jing bang in tu a Covid-19 a hahsatna, gentheihna i tuahte i hundampa Jesu Khrist in a hung thuahpih chih manghilh louh a hoih diing hi. Hubaan ah, zohna gual a tun tan Redmond pa in a liang a pokawma a taipih bang in I leitung hinkhua a bei matan I pa Pathian I kawma um jing ahi a (Matt. 28:20), I hahsat huna i lang a pangjing ahih daan a hung langsah hi.

Hubaan ah, a tawptan a taitungva mipi te'n zahtatna khutbet a bawl bang un, I khovel hinkhua a bei chiang in vaan a I pa Pathian leh a ngelte in, "Suah hoih, napu kipahna a lut in" chi'n ging kilawm in ahung na vaidawn diing uhi. Damlai Khawwei kitaidemna ah, Pathian toh tonkhawm ah ginumtaha amah toh khosa khawm diing in Pathian in ahung chial jing hi. Gahsuahna jong poimoh mahleh, amah (Pathian)a diing a ginumna khu poimoh masapen ahi.

KA LIIM IN TAAU BULH SEL-SAL

~ Unknown

Naupang neucha i hih lai hun va, Pi-le-Pute'n taangthu ahung hilh jeel te uh khat chu..... Mikhat in midang liim mu in, amah liim sa in, Ka liim in tau bulh selsal, khi-oh selsal, ken lah bang mah tohloh sing.! chi in a liim en in hoih leh kilawm asa mahmah hi. Himahleh amah a ki et chiang in a liima amuh dan toh kibang lou jeel in a lungbuai mahmah mei hi.

Tulai i gam Khristian hinkhua i ngaihtuah tah chiangin, Hichi bang giap Khristian hinkhua zang i hi kha diing uh chih lau huai isa mahmah hi. I Khristian hindaan diing uh hoihtah a Bible a kigial hina jeen pi, ei Khristian kichite hichi banga i umlouh diing uh ahi. I liim chauh un tau bulh a en bulh lou a bang tan um nalai diing i hi viai le...!

Mahatma Gandhi in jong Bible a simsime chia hoih sa in Biah inn a va kikhop a, tawp tah chia Pastor toh hoihtaha houlim ut chi in Biah inn lam va zuan a, Usherten a na luut phal sih uhi. Hu nung Biah inn a kikhawm d'a a damsung teng chiah kiit sawm nawn lou chih a mah mah in a nichin tanchin gelhna Dairy ah agelh achi uhi.

Ei Biah inn a midang hung kikhawm khaten, hung kikhop jeel a lunggulh di viai..? huleh Ang tang a kisa di viai..? ahihlouhleh ka va kikhop ka kisiih a chimai mah di viai..! Miin nang ahung muh kaal ngaah lah, a hung houpih kaal ngaah lah taah mei a, ahung houpih lai un ka houpih ma ngaihuai a sa mai mah diviai..?

A gaal apat et a ateh ahoih a hoih, a mun tung tah chia a gah muh di umlou theipi kung bang meimei i hih khah diing uh lau huai ahi. Hubanah I liim chouh a tau bulh leh khi-oh hilou in, ei mahmah in atah tah in jong khi oh in, tau bulh in, i Khristian hinkhua kilawmna midangte muh theih diing leh ei mahmah in zong i muh theih diingga Pan thah lachiat in, Lalpa min Loupina diingga kijat tam i sawm chiat diing uhi.

Lalpa'n hung malsawm chiat ta hen

THUHUN LUI ZAWLNEITE LEH A ZAWLNEI NATOH HUN A KUMPITE

By ~ S. Pauchinlian

2 Kumpipate 17:13, “*Huchiin Lalpa’n a kawmvah, Na umdan hoihlou haw uh tawpsan unla, na pute uh ka na thupiaah, ka suahte zawlneite manga ka hung haahdan dungjuiin ka thupiahte leh ka daante jomin chiin zawlnei jousiah leh muthei jousiah mangin Israelte leh Judate thu ana hesah hi.*”

Pathian in Israel leh Judah mite zawlneite tungtawn in a vau jel hi. Tulai a thunatongte'n gamsung a mite sual kisiih diing a a chial zing bang ahi hi. Tuniin, Israel gamsung a zawlneite, bang hun a zawlnei nna tong ahi viai? zawlnei nna a tohlaiin kumpi a pang koi ahiai? Huleh a zawlnei thupuah khoiah a simtheih diai? chihte tomkim in i en diing uhi. Hite i heetna in thugen diing i kisingsahna, thugenna, thuhilhna leh houlimnate ah zong a phatuam diing in ka gingta hi.

1. ABIJAH (934 - 909 BC). Zawlnei Abijah in Israel kumpi Jeroboam-I hun laiin zawlnei nna a tong hi. A tanchin saulou 1 Kumpipate 11: 29 - 39 sung ah amuhtheih diing hi.

2. ELIJAH (875 - 848 BC). Zawlnei Elijah in zawlnei nna kumpi Ahab hun laiin a tong hi. A tanchin tomkim 1 Kumpipate 17:1 - 2 Kumpipate 2:11 sung ah a simtheih diing hi.

3. MICAIAH (865-853 BC). Zawlnei Micaiah in Israel kumpi Ahab leh Judah kumpi Jehoshaphat hunlaiin zawlnei nna a tong hi. A tanchin tamlou 1 Kumpipate 22:8 leh 2 khangthute 18:28 ah a kigen hi.

4. JEHU (853 BC). Zawlnei Jehu in Judah kumpi Jehoshaphat hunlaiin in zawlnei nna a tong hi. A tanchin neukhat 2 Khangthute 19:1-3 sungah a simtheih diing hi.

5. OBADIAH (855-840 BC). Zawlnei Obadiah in Judah kumpi Jehoram lal laiin zawlnei nna a tong hi. Amah tanchin toh kisai

Zawlnei Obadiah lehkhabu ah tamlou a muhtheih diing hi.

6. ELISHA (848-797BC). Zawlnei Elisha in Israel kumpite; Joram, Jehu, Jehoahaz, leh Jehoash te lal laiin in zawlnei nna a tong hi. Amah tanchin 2 Kumpipate 2:1-9:1;13:10-21 sungah amuhtheih diing hi.

7. JOEL (835-796 BC). Zawlnei Joel in Judah kumpi Joash lal laiin zawlnei nna a tong hi. Amah tanchin saulou zawlnei Joel lehkhabu ah tamlou amuh theih diing hi.

8. JONAH (793-753 BC). Zawlnei Jonah in Israel kumpi Jeroboam - II lal laiin in zawlnei nna a tong hi. Amah tanchin 2 Kumpipate 14:25 leh zawlnei lehkhabu Jonah ah tamlou a muhtheih diing hi.

9. AMOS (760-750 BC). Zawlnei Amos in Israel kumpi Jeroboam - II lal laiin zawlnei nna a tong hi. Amah tanchin a kimzaw in zawlnei lehkhabu Amos ah a simtheih diing hi.

10. HOSHEA (753-715 BC). zawlnei Hoshea in Israel kumpite; Azariah (Uzziah), Jotham, Ahaz leh Judah kumpi Hezekiah lal laiin in zawlnei nna a sem hi. Amah tanchin a kimzaw in Zawlnei lehkhabu Hoshea ah a simtheih diing hi.

11. MICAH (742-687 BC). Zawlnei Micah inzong Israel kumpi; Jotham, Ahaz leh Judah kumpi Hezekiah lal hihlaiin zawlnei nna ana sem hi. Amah tanchin zawlnei Micah lehkhabu ah a kimzaw in a simtheih diing hi.

12. ISAIAH (740-681 BC). Zawlnei Isaiah in Israel kumpi Azariah (Uzziah), Jotham, Ahaz, Hezekiah leh Manasseh Judah kumpite lal hunglaiin zawlnei nna a tong hi. Amah tanchin saulou zawlnei lehkhabu Isaiah ah a simtheih diing hi.

13. NAHUM (663-654 BC). Zawlnei Nahum in, Judah kumpi Manasseh lal hun laiin zawlnei nna a sem hi. Amah tanchin zawlnei lehkhabu Nahum ah a simtheih diing hi.

14. ZEPHANIAH (640-621 BC). Zawlnei Zephaniah in Judah kumpi Josiah lal laiin zawlnei nna a tong hi. Amah tanchin saulou zawlnei lehkhabu Zephaniah ah a simtheih diing hi.

15. JEREMIAH (627-586 BC). Zawlnei Jeremiah in Judah kumpite; Josiah, Jehoahaz, Jehoiakim, Jehoiachin, leh Zedekiah

lal hun laiin zawlnei nna a tong hi. Amah tanchin leh zawlnei thupuaah zawlnei lehkhabu Jeremiah ah a simtheih diing hi.

16. HABAKKUK (612-589 BC). Zawlnei Habakkuk in Judah kumpite; Josiah, Jehoahaz, Jehoiakim, Jehoiachin, leh Zedekiah lal laiin zawlnei nna a tong hi. Amah tanchin saulou leh a zawlnei thupuaah zawlnei lehkhabu Habakkuk ah a simtheih diing hi.

17. DANIEL (605-536). Zawlnei Danial in Babylon a Judahte saltaang lai leh Medo-Persia in Babylon tunga a gualzoh tan in zawlnei nna a tong hi. Amah tanchin leh a zawlnei thupuaah zawlnei lehkhabu Danial ah a simtheih diing hi.

18. EZEKIEL (593-581). Zawlnei Ezekiel in Nebuchadnezzar lal na nuaiah Judah nam saltaang laiin, Babylon gamah zawlnei nna a tong hi. Amah tanchin leh a zawlnei thupuaah zawlnei lehkhabu Ezekiel ah a simtheih diing hi.

Hih Zawlnei 18 teng in zawlnei nna Babylon saltaangma leh saltaang laiin a tong uhi. Huleh zawlnei; Haggai, Zechariah leh Malachi te in, Babylon saltaang na apat puikiit/kiihkiit nung in zawlnei nna a tong uhi.

19. HAGGAI (520 BC). Zawlnei Haggai in zawlnei nna Babylon saltaang nunga Judah gam a tunkiit nung un a tong hi. Hulaiin mipi lamkaihtu chu Zerubbabel leh Joshua (siampu) ahi. Aman mite Pathian biahinn lam diing in a haanthawn a, huleh biahna Pathian pomtaah bang ahiai chiin zong mipite ahilh hi. Amah tanchin leh a zawlnei thupuaah kimzaw in zawlnei lehkhabu Haggai ah a simtheih diing hi.

20. ZECHARIAH (520 BC). Zawlnei Zechariah in zawlnei nna Zerubbabel leh Joshua siampu hihlaiin a sem hi. Aman zong Pathian biahbuuh lamdiing in mite a hasot banah, Pathian in Israelte leh Messiah tungtawn a khovel a gualzawl diing zong agen hi (9:9,10).

21. MALACHI (430 BC). Zawlnei Malachi in zawlnei nna a tohlaiin, Judah gam a vaihawmtu/kumpi koi ahih chih a chiang sih hi. Himahleh amah zawlnei nna toh hunlai in siampute chu mite lamkaihtu hideuh in a kigen hi. Amah tanchin leh zawlnei thupuaah a kimzaw in zawlnei lehkhabu Malachi ah a simtheih diing hi.

BABEL INSANG APAN KIHASOTNA

By. Genson Tungnung
Missionary to Arunachal Pradesh

“Huleh amahun, hung kisa un, khopi khat leh insang avuum vaan su ding khat ilam diing uh, huleh i min isu thangdiing uh, huchilou in chu leitung pumpi ah thehdalh in i um kha diing uh achi va”
(Genesis 11:4)

Hi Bible chang apat in mihingte lunggel akihethei hi. Huchu bang ahiai ichihleh; (1). Kikhual diing (2). Minthang diing (3). Nuamtah a khosa diing chih ahi. Ahiin hichu Pathian in ahung siam nasan ahi sih hi. Pathian in mihing a siamchiil in, gah tampi suang a, leitung dimsuh/luahsuah diingin ahung malsawm hi (Gen.1:28). Pathian in Noah leh a tapate a vangpiah a, a kawmvah gahtampi suang in hung pung unla, leitung dimsuh un achi kiit hi (Gen.9:1). Hizongleh amauhte'n Pathian thupiah manglou in khopite leh inn thupite bawl in, hutahah nuamtah aum diingin a kisa uhi. Hijongleh Lalpa'n a haam uh suhlimdang sahin a natoh uh sunzom thei nawn louin leitung pumpi ah a thehdalhta hi (Gen.11:9). Pathian in a mite chu mun khat a umden

diingin ahung chisih a, khovel muntuam-gamtuam a ki thehdalh a a thupina phuangjaah tute hi diing in ahung deih hi.

Ei gingtute'n Babel innsang apan zil diing i nei uhi. Babel innsang in kithupisahnate, Pathian deihlam sanga mahni deihna thupi ngaihzohnate, Pathian in ahuat dan leh a lauhuai dan ahung zilsah hi. Huleh hi khovel loupinate, hauhsatnate bangmah ahihlouh dan zong ahung zilsah hi. Hijongleh gingtu tampite'n Babel innlamte bang in khovel silte i buaipih zaw uhi. Pathian in gingtute hi khovel ah kikhual diing thu a soi kha sih hi. Johan in a lehkhat hot ah, *khovel lungsiat sih un, huleh khovel a sil umte jong lungsiat sih un* achi hi. Hijongleh Pathian deihjawng bawl diing in ahung hasot hi.

Ajiahchu khovel chu a loupina
toh abei pai diinga, hijongleh
Pathian deihjawng bawl mi
chu kumtuang in aum diing
achi hi (1John.2:15-17).

Pathian in ei gingtute hi khovel
a kikhual diing thu agen kha
sih hi ((Matthew 6.19-20).
Hijongleh khovel jousiah
ah chiah a, silsiam chinteng
kawm ah Tanchinpha soi
diing in thupiah ahung piah
hi (Mark.16:15). Haamteina
leh silpiah a i pangkhawmnate
uh jaalin pawl neucha
hijonglehang Cross- culture,
hamtuam- namtuam te
kawmah Tanchinpha i soi
theita uhi. Hijongleh gam
laah diing tampi a um nalai
hi. Linguistic te suidan in
khovel ah minam tuam- tuam
17,406 bang a um achi uhi.
Huleh Global Team Christian

Organization te'n mi nam
7402 te in Tanchinpha za nai
lou achi uhi. Hichu khovel ah
mi nam 40 tein Tanchinpha
hekha nailou chihna ahi.
Pathian gam natohna ah
thaselou a pan lasem diing
in kouhtuamte i kichial uhi.
Abihtahin ka khanglai pihte
chouna (challenge) ka hung
bawl nuam hi. I pilna, i siamna,
i talent te tungtawn in lam
tuamtuan in Lalpa nna i sem
thei hi. Lau lou in Lalpa nna
semni. Pathian in Abraham
akouh lai in malsawmna
thupitah (great blessing) zong
achiam hi (Gen.12.1-3). Hu
mahbangin ei gingtute ngeei
zong malsawmna thupitah toh
Tanchinpha soi diingin ahung
sawl ahizaw hi (Matt.28:20).

Lalpa'n simtute hung malsawm
chiat ta hen.



Taangte lamah ka mit ka hahtou diing hi;
Khoi apatin ahiai keimah hung kipanpihna a hung
tun diing? Kei hung kipanpihna chu LALPA,
Lei leh vaan siampa apatin a hung tung hi.
Ama'n na keeng akitaal a phal sih diing hi;
Nangmah veengtu chu alusu sih diing hi.

Phatna Late 121:1-3

JESU'N NANG KAWM AH BANG A SOI EI?

By~ L. Ginsuanmung

Jesu'n mi a suhdam johchiang in, a bawl diing dan uh ahilh jel hi.

Etsahna:

1. Mi bilbing/bil ngong leh haamtheilou pa a suhdam in....
Koimah hilh lou diing in thu a pia hi.(Mark 7:36).
2. Gadara a dawimatpa a suhdam in, Jesu'n a kawm ah....
Na inn ah chiah inla'n, Pathian in nang a diing a sil thupitah ahung bawl sah dante va hilh in achi hi (Mark 5:19).
3. Numei angkomlai amat nu uh kawm ah Jesu'n, 'Pai inla'n sual kiit nonsin a chi hi' (John 8:11).
4. Phah asuhdampa kawm ah Jesu'n Pai inla'n, siampu kawm ah va kilaah in chiin asoi hi. (mathew 8:4).
5. Numei sipawt adamsahnu kawm ah Jesu'n hamuangtah in pai in achi hi.
6. Samaria numeinu kawm ah Jesu'n Na pasal va kou in achi hi. Jesu apat damna tang tengteng silbawl diing a tuamchiat hi. A mijia uleh a bawl diing va poimo asah bang jeel in Jesu'n a soi uh ahi a, koi mah a aki bang aum sih hi.

DOTNA. Jesu'n nang kawm ah bang a soi ei?

Tuhun in, tahsa a i kimuhtheih nonlou vang un, lungsim leh hagau in i kimu thei nalai uhi.

"*Ajiahchu Amah hagau i kawm vah a umta hi*" (Johan 3:6).

Tahsa a piang photmah tahsa ahi a, hagau a piang photmah hagau a ahi.

Hujiahin Pathian hagau in na lungsim a ang theihsah bang jel in bawl in, Huchu ahung sudampa(Jesu) tung a na kipaahna natoh ahi (Johan 14:26).

Hamuantu Hagau siangthou Pa in ka min in ahung sawl diing a, Aman sil jousiah nang uh ahung hilh diing hi. Ama'n, na mijia leh na hihna jousiah a thei jouta a, na bawltheih diing toh kituaah a ang soi ahi. koimah a Natoh uh a kibat sese diing ana hituanlou ahi. Midang a suhdam te sangin, Samari numeiu a hahsa pen diingin a gingtat huai pen hi, a pasal va kouh diing chih ahi mei hi. Khopi a mite kawm ah ahihna ava kiphuan diing khu sil hahsa tah ahi ngei diing hi. Numei duhdahlou khat hinalai, a sawlpa lah nialgual ahisih ngal a.

DOTNA. Na ngaihtuah kha ngei ei?

Samari khopite'n numei duhdah lou (pasal 5 neita) nu thusoi ana gingtat uh chu ahamphat pih uhi. Amah un Jesu a va mu sih uhi. Numei thulimlou khat thusoi pouh chi in ana simmoh in, ana nuih san in, ahihna toh kituaah in ana housia (judge) uh bang hitaleh Jesu mulou diing hi uhi. Hujiahin a lungsim hoihna uh dampih uh ahi i chi lou thei sih hi.

Huchi ahijiahin, Ei mimal chiat ahung kihilhna bang jeel in Pathian Nna i tongdoh diing uhi.

- #. Soi lou d'a thupiah a um i hih leh bangmah i soi dah mei diing uhi.
- #. Soi d'a thupiah a umte'n hah soi in i soi diing uhi.
- #. Inn kuanpihte kawm ah hilh d'a thupiah a umte'n jong ahung ki hilh bang bangin i bawl diing uhi.

Pathian in ahung hilhdan leh ahung koihna mun bang jeel a i toh/sep khat chu athu mangna ahi.

Q. Pathian in bangchibang a bawl diing in nang kawm ah a soi ei?

Jesu toh kituaahte'n bawl diing khat chiat anei teitei uhi. Aman mi ahihna bang chiat leh a capacity bang jeel un abawl sah jeel jaw hi (Luk 17: 11-17). Jesu'n phaah 10 asuhdam lai a, athusoi.

v15. Huleh alah va khat in adamta chih akiheettah in, a kinungleh kiit a, aw ngaihtah in Pathian a paahtawita hi.

v17. Huchiin Jesu'n a dawng a, mi 10 hung siangthouta na hi sih viai mah? Himahleh 9 te khoi ah a um tai?

DOTNA: Jesu apat damna ngah/tang hi na jeen a, Pathian paahtawi loute lahah na pangkha ei? Ahihlouhleh Kipaahthu soi a Pathian phat pa in na pang kha ei?

Lalpa'n ahung kouhna bang jeel a, suhdamna jiah a, heetpihtu apang a, natoh hoih tong doh thei diing in, simtute jousiah hangsanna Lalpa'n hung pe chiat ta hen.

GEORGE WHITEFIELD TANCHIN

(1714 – 1770 AD)

Lettu: S. Pauchinlian

TANCHIN LAAHTOM

George Whitefield in minthangna leh kaisangna a lau hi. A thugen ngai diing mi tampi a hung kikhawm va, huleh aza a sim in Khrist ah pianthahna zong a nei uhi. Amah ahihleh London a khangthah manpha pa chiin a kithei hi. A thugen in Great Britian leh United States te a tohliing zou a, hubanah a nasepna gahte tunitan in zong muhtheih in aum zing hi. Taangthu suutte (Historians) gen dan in Whitefield in kaal khat in daahkaal 40 apat 60 tan Pathian thu genna in anei a, huleh kum 34 Pathian nna asep hun sung in sermon 18,000 val a gen doh achi uhi. Whitefield in thugen diing in Atlantic tuipi zong 13 vei tah kaan in,

hu gam a um America mite kawmah Pathian thu nasatah in ava gen hi. Hubanah Great Britian a zong mi a saang a saang a sim kawm ah Pathian thu a gen a, huleh Ireland gam zong thum vei vapha in, Scotland gam zong 14vei tah tanchinpha gen in ava kalsuan kha ngeei hi.

Alawi ngaihtah khat in Whitefield thu hahgen taluateh a chihleh, ama'n a dawngna ah “*Ka pumpi ka tui eeh saang in gim diing ka deihzaw*” a chi hi. Ama'n a thugenna dang ah hi chiin ana gen zel hi, “*In a sep uh i zoh masang a sitheilou diing i hi*” chiin a gen hi. Damtheih na lamah Whitefield chu midam theilou ahi a, luaah (vomit) zong a lua zel hi, ahihvang in zingkaal teng in daah 4 in a

thou hi. A naseppihte ten a theih tah un a hindan thupi a sa mah mah uhi.

NEULAI TANCHIN

George Whitefield ahihleh December 16, 1714 in Gloucester mun ah innsung zahumtah neih leh lam lamah zintun inn (Hotel) neite innsung ah a piang hi. Whitefield kum 2 ahihin a pa'n beisan a huleh a nu in kum 8 zawh in pasal dang neihsan hi. A nu pasal neithah ziahin hahsatna leh gentheihna in a dim zaw hi. Whitefield chu a neu a pat in, naupang kamtei tah ahi a, huleh school ah zong thugen lam leh mi umdan chiing a siam mahmah hi. A naupang lai thugen siamna pen a hung piching nung in Pathian nasepna lamah nasatah in a hung phattuampih hi.

KHANGLAI HINKHUA

Khanglai ngeina bang in Whitefield in zong siatnate ana bawlve hi. Etsahna diing in a nu sumbawm apat sum gu chihte zong ana chiing kha ngeei hi. Huleh a naupang laiin Pathian thu a gen utdan te zong ana genkha zel hi. Whitefield in lehkha a gelhna te ah "kei chu Pathian thugen ka na ut

zing ahi a, huleh hun teng in Pathian thugen te thugandan, a haamtei dan uh ana thoh/chiing zing ahihdan a gelh hi." Kum 15 ahih in lehkhasim khawl in, a nu zintung inn (Hotel) enkawl diing in a kithuahpih hi. Piangthah nailou ahihvang in Bible a sim zing hi, huleh a sanggam pa toh Bristol a Biahinn ava kai chiang un a kipaah mahmah hi. Biahna lam toh kisai ah kilankhe zel a himahleh Gloucester lam a kileh chiang in a hinkhua a lui/ngeina bang in a zang kiit zel hi.

PIANTAHAHNA

Pathian hehpihna jalin Whitefield in a lehkhasim sunzom thei kiit in Oxford ah a kai a, huleh humunah John Wesley leh Charles Wesley toh a kithei va, amauh tegel toh kithuahin Holy Club ah a pangta hi. Wesley te unau leh a loite un khangdawng hinkhua siangthou a zang uhi. Pathian thu a theih vaang un pianthah diing thu ana theisih va, ana kihilh na uh ahihleh Pathian deihlam thu a kihoulimna, khat leh khat a dih, ahoihlam a kihilhna leh mizawng gentheite kithuahpih diingte ahi.

John Wesley in Whitefield kawmah Henry Scrougal's lehkhabu gelh "The Life of God in the Soul of Man" ana pia a, huleh hi lehkhabu a sim zoh in Whitefield in Pathian sillimdang bawlte leh pianthah diing thu a hung theichiangta hi. Ajiah ahihleh hih lehkhabu a sim ma in Whitefield in pianthah diing thu ana jakhasih a huleh pianthahnna hinkhua leh zalenna zong a nei sih a, ahivang in pianthah na lampi a hawl hi. A tawpna in kum 1735 in Pathian khut ah kipekhia in Jesu hundamtu diing in ahung sangtahi. Huzoh in Whitefield Gloucester ah akilehkiit ta hi. A damsung a Bible khuupdin a sim diing in a kipanta a, huleh Grik ham a Thuhun Thah a sim pan hi. Mathew Henry Commentary kichi Bible Hilhchianbu a lei a, hoihtah in a simpan a huleh maban ah a thugenna mun jousiah ah a pua in a sim zing ta hi.

PATHIAN NATOHNA

George Whitefield in a kawm ah mi tamlou a khom a, a mihon khopte chu nidang a siatna a akibual lai a lawi lui te bang ahi uhi. Amauhte chu kaal khat in khatvei bang a

kimukhawm va, hi hun chiang in Bible simna, haamteina huleh khat leh khat kihasot tuahna in a hunte uh a zang bei zel uhi. Huchiin hicha a kipawlkhawmna uh chu Methodist Society kiphutdoh masapen a hung hita hi. Hi Methodist Church pen John Wesley leh Charles Wesley te phuhdoh hilou in George Whitefield in aphuhdoh pen mi zousiah in limdang a sa uhi. Wesley te unau zong Methodist ah a hung luut va, huleh Whitefield in lamkaih na teng amahuh unau kawm ah a pekhia hi.

March 1736 kum in Whitefield Oxford ah a kileh kiit a, Wesley te unau zong Georgia lam ah General Oglethorpe toh Pathian nna sem diing in a paita uhi. Huchiin June 10 in George Whitefield zong Deacon diing in Bishop Martin Benson in Gloucester ah ordained ana bawl a, huleh June 26 ni in mipi mai ah a thugen masapen ana nei hi. Mipi kikhawm te in Whitefield a mu utva, a thei ut mahmah uhi. A tamzaw te a innkuuanpih te leh a loite ngen ahi uhi. Whitefield hagaulam a pilna a neihna ah a hung kikhom mipi te'n a kipaahpih mahmah uhi. Huleh a thugen

ngai mi khat in Bishop pa kawm ah, Whitefield sermon jiahin mi 15 in hagaulam ah ki muthahnna a nei uhi a chihleh, Bishop in hi kimuhthahnna a neih uh Pathianni kiit tan chouh daih hihdah hen achi hi. Huleh hichu a silbawl limdang te kipat na ahi. Huchiin Whitefield in July ha in graduate a zou a huleh ha nih sung London ah a lawipa thugenna kithuahpih diing in a pangta hi. Huzoh Oxford ah ha 4 thu a gen a, Bristol leh London ah zong thu a gen hi. *Mi a sang sawm a sim Whitefield thugen ngai diing in a hung pai zel va huleh a za a sim in pianthahnna a ngah zel uhi.* Hihaza a sim hagau mangthang te counseling amah mahmah in abawl zel hi. Whitefield thugen in mipi te a suhah mahmah a huleh a thugen ja mi tampi in a phattuam pih uhi. George Whitefield in thupi kibang a thugen mun mahmah chu “Na pianthah ngeei ngeei diing ahi” chih Johan 3 a Jesu leh Nikodem kihouna ahi, a gen mun mahmah vaang in a gen chiang in mite’n Khrist keengbul a hung zuan zel uhi.

February 1, 1738 in John Wesley Georgia apat lungsim nuamlou tah leh gaal zou

lou in a hung kinungleh hi. Colony a ana sepna a lohsam a vaangsiat umtah in minsiat na leh gaal tampi toh a nusia hi. Huhun laitah in Whitefield in Georgia a diing in kouhna a mu a huleh Wesley te hung paina Long (Ship) England a hung tung chiangin pai diing in a kisa malawh hi. Wesley in Whitefield a kimuhtuah pih utsih hi. Ahihvang in Georgia ah chiah lou diing in Whitefield kawm ah a gen hi. John Wesley gindan ahihleh thilkhat a lohching louhleh Pathian deih hun chiang in amah leh a loite tung a hung taangtung mahmah diing a chi hi. Whitefield in Wesley thugen ana mang henla Pathian deih hun chiangin hung lohching diing ahi ana chileh America mite diing in mangna liantah ahi diing hi.

Huchiin February 2, 1738 in Whitefield in Colony te sagih vei a vohna lahah a masatnapeen diing in ava kuankheta hi. Pathian gualzawlna leh hehpihna jalin halthhahnna nasatah ahung umta hi. May 7 in Savanmah Georgia ah Whitefield a tung kiitta hi. Huzoh in John Wesley utlou sasa in Aldersgate Street a kimutuahna khat ah a vatel

a huleh a lungsim a nuam a, hutdamna kipaahna dihtah Jesu ah a muta hi. Huchiin Wesley zong awl awl in thugen a hung kipan a Whitefield in a nuutsiat a sepna a hung sunjom ta hi.

Whitefield London ah December in a hung kileh a huleh kouhtuam 4 in amah a na kipaahpih sih uhi. Ahihvang in a ma'n a saang aza kawmah thu a gen kiit a, Hagau Siangthou nasepna nasatah a hung um a huleh Wesley toh kithuah in Pathian thu a gen lehleh ta uhi. June 14, 1739 in Whitefield chu Pastor diing in Church of England ah Ordained a tang a, huleh a damsung a Pathian nna asep sung in a Ordained a ana kichiamna dihtah in a zui hi. Amah nasepna kouhtuam tuamtumte kikhopkhawm na ahihvangin chihtahtah in Church of England tapa in a pang zing hi.

Kouhtuam hung khanglian deuhdeuh in Whitefield a kiheetmohbawl tah un, Whitefield in kholai a (open air) thugen February 17 ni in Kingswood Bristol gei ah apanta hi. Whitefield in kholai a thugen apatni chu England gama diing in haatni ahi chiin

zong a heettheih hi. Charles Spurgeon in a naupang te kawm a agenna ah Whitefield in suangkheeng nasem mite leh a innkuante uh mi 200 vel koukhawm in Pathian thu ahilh hi. Pathian hehpihna jalin ken mite lungsim taah (hard) ka suhkeehsahta chiin evangelist khat in zong a gen hi. Huni apat in mipi tampi in Whitefield thugen ngai diing migenthei hileh a hausate hileh a hung paikhawm zel uhi. Naupang neu chacha te zong thugen ngai diing in ahung pai zel uhi. Whitefield in kholaia thugen chu Britain leh America ah zong a sunjom zel hi. Benjamin Franklin gendan in Whitefield thugen mi 30,000 vel in khatvei thu in hoihdeuh in a ngai diing uh a chi hi.

Whitefield in kikhopkhawmna khat a hung bawldoh a huleh a enkai diing in hutdamna tangsa dinmun dettah neite a ngansiah hi. John Wesley in zong Whitefield thugen dan enton in kholai a thugen ahung pan a, hichu Methodist paidan ahi chiin a kimin vuah hialta hi. Huleh hipen Oxford a umlai va a kikhopkhawm na uh Holy Club kichi luanga hung um ahita hi.

Whitefield leh John Wesley thugen a piangthah lou Pathian thu gingtalou pawlte'n a pastor te utoh a dem va, a sugenthei ta uhi. Wesley leh Whitefield te a diing in suang a seh zong sillimdang ahi nawn sih a, huleh husang a huaise zaw in zong a sugenthei uhi. Ahihvang in Jesu nungzuite bang in a thugen uh bangma in zong akhap zou sih a, a thugen ngeina bang thugen in kipawlkhawmna a nei zel uhi.

Kum hung pajel in Whitefield in America a Pathian thugen diing a hung tumta hi. Ajiah ahihleh; Pathian iitna thugen utna leh, Georgia a tagahte etkolna diing a inn bawl a uut jiah ahi. A siltupte America a um aloite'n zong adeih va a kithuahpih uhi. Hizongleh amah a diing in tha, sum, hun leh a damtheihnna diing chu a puahgih a hung hizaw hi. Achaang chiang in a inn etkolna diingga a sum bat a tam ziahin Police te mat a um diing a lau hial hi. George Whitefield in Georgia a nasem tute a va hehnem zel a, a va enkai zel hi. George in Georgia te hagaulam a thuhilhna, a kithuahpihna, a iitna gen zoh gual ahi sih hi.

THUGIN KITUUAHLOUH JIAHA BUAINA

John leh Charles Wesley te unau ahihleh Arminian thuhilh zui mia hiva, himahleh Whitefield chu John Calvin thuhilh zui mi ahi. Wesley te unau in teel (election), tung na diing guatlawh sa (pre-distination) huleh gingtute hutdamna mangtheilou ahi chihte a pomsih uhi. Khatvei bang Charles Wesley in John Calvin ahihleh Dawi (devil) tapa masapen zong ana chikha ngeei hi. Whitefield in Wesleys te unau kawm ah a paidan uh kibatlouhna uh tuamkoih a pulpit tung ah genlou diing in ngeen kha ngei hi. Himahleh Wesley's te unau in a ngetna a ngaihsah sih uhi. Whitefield in America a thu a gen lai in, John Wesley in "Hehpihna Thawn" chih lehkha gelh in Whitefield a dem panta hi.

George Whitefield leh Wesley te unau kituahlouh na in Methodist a khenjaah a, huleh Calvinistic Methodist kouhtuam thah a kiphut a huleh Wales gam ah a haat mahmah hi. Hih a kituahlouhna uh ahihleh a lang nih in a mohna uleh adihlouhna uh a um chiat

hi, ajiah ahihleh mihing a thudih pen zong buan a siam ahiziahin. Wesley thuhilh Khristian a bukim na pen Whitefield in a zadah a huleh Whitefield thuhilh ‘Hehpihna athawn a piaah’ pen Wesleys in a zadah mahmah hi. Whitefield in Wesley te toh a kituaah theihna diing in pan nasatah in a la hi. A lungsim a kituaah louhna uh mi a theisah utsih a, huleh a tawp khong in Whitefield in a Ministry leh a sepna teng Wesley te kawm ah pedoh in amah a pawtdoh hi. Ama’n a genna ah ‘kipawl khawmna neihna diing in lamkai hih a poimoh sih hi, huleh Pathian hehpihna zal in lamkai hihna zong ka deih tuan sih, a chi hi.’ Ahihvang in ken ka theihtan in dihtah in Jesu Khrist thu gente bang kouhtuam hilehuhzong ka kithuahpih diing hi a chi hi.

Whitefield a nungzuite’n a ministry a piahdoh ajadah va himahleh a ma’n ‘ka min ki mangngilh henla, mite totdeen in um leng zong, Jesu min a minthang photleh ahoih hi. Ministry leh kiloikhawmna te enlou in Jesu chouh enni. A lianpen koi ahih ka thei utsih a himahleh kei koi kahih ka kithei hi. Huleh miteng suaah

hihdiing zong khaw kasa sih hi, a chi hi.’ Whitefield in Pathian ngaihsah numei Lady Huntindong kawm ah lehkha a thot a hichiin a gial hi, “miteng a pat in sil tampi zildoh ka nei a, himahleh a lian hihdiing ka tum sih hi, huleh ka kingaihsangna a thupipen ahihleh miteng kithuahpih tu hi a koimah lutung hihlouh diing ahi hi.”

WHITEFIELD HINKHUA NUNUNG LAM

Whitefield in a hun neihteng in mi kithuahpih na in a zang a, huleh a hung minthang deuhdeuh ta a, amah gensia leh thudihlou gen ahung tam deuhdeuh uhi. London a a hamdan a chiing sahva huleh laa hoihloute a sahkhum uhi. Whitefield in huteng a kitheihmohbawl a, Jesu Khrist mah en in a nasep a sunjom zel hi. Jesu Khrist gingtalou amah dem a thugente sang in a gingtate a kikhen thaang diing uh a pawnaw zaw hi. Huleh Wesley te toh a kikhen jiah va mi bangzah aha khat lungkete a lungkhampih zaw hi.

Kum 1770 September 30 in America ah a sagih vei zinna ah George Whitefield a si a huleh Massachusetts

Presbyterian Church New Buryport ah a kivuita hi. Whitefield in inn polam ah mi 30,000/40,000 kawm a thu a gen pen a thupi mahmah hi. Amah ahihleh Methodist Church phutdohtu dihtah ahi a, ahihvang in ahihna tengteng mitoh a kituaah theihna diing in midang khut ah apedoh hi. Tagahte etkolna diing a theihtawp a suah a, sum a dongkhawm zel a huleh school tampi zong a phutdoh hi.

Whitefield in a hinkhua a abawldoh teng a thupi mahmah a huleh amah hinkhua mahmah zong a thupi hi. Spurgeon in a gandan in, ‘*Whitefield taangthu ka sim tan in ka lungnung ah amah theihbeh utna a umzing hi*,

huleh amahzong ka lung ah ahing zing hi. Mihing tampil a hing hamham va ahihvang in Whitefield ahihleh mei bang a sa in, leng na diing hanei a haatna toh a hing hi. Kei mah mimal muhdan in George Whitefield ahihleh Pathian a kituluut mi ahi a, huleh kei zong amah bangzou sihmah zongleng amah bang a Pathian nasep diing ka ut hi a chi hi. Whitefield Pathian a diing a achihtahna leh kipiaah zohna chu a thupi mahmah hi. Tahsa hisel loutah ahihvang in Khrist leh a lalgam a diing a veinatna, leh puahgih a neihte chu a sem mualsuaah hi. Whitefield tanchin tomkim et in nang leh kei diing in bang lamah chouna a hung pia ei unau?



Ajiahchu hehpihna jiahna ginna jaala hutdam na hi uh, hu zong nanguh a suaah ahi sih; Pathian silthawnpiaah ahi, natoh jiahin ahi sih, huchilou inchu mi in a suang kha diing uhi. Ajiahchu Pathian in malai peha i umna diingga anaguatkholh Khrist Jesu a nna hoih tong diingga siam, Amah khutsuaah i hi uhi.

Ephesite 2:8-10

GINNA

By ~ S. Kamthansang

“Huleh ginna chu sil kinepnate heetchetna, sil muhlouhte um ngeia heetna ahi” Heb. 11:1.

Malaia I pi leh pute'n lungmawlin singbul suangbul gingtain Pathian ana biava, a ginna uh leh a tahnanna uh silbawltheia hein ana dampih uhi, hun hung pai jeelin saapte in silsiam jousiah kawma tanchinpha soi diinga Pathian thupiah juiin sih khawhsa louin nam ngiam singbul, suangbul bia leh mi lu la namte hung hawldohin Khrista Tanchinpha hung hilh in ipu leh pate'n ang gingtava, ana biaian ama ana biah uh taisan in Pathian tah ana tahnsgta uhi. Tu hunin eite kawma gen ngai nonlouin Pathian ihe in ikitahsan chiatta uhi. Ahinlah ginna peen ataha juilouin I Khristian hihna isuang jawta uhi.

Bible a ginna thupi tah Abraham ginna leh tahnanna ah zil diing atam mahmah hi. Apa Tera milim Pathian bia huleh a innkuuan uh zong milim Pathian bia hi diinga ginum ahi. Hile jong khatvei chu pathian in Abram kawma anu leh pa leh innkote apata hung pawt a gam a etsahna diing lamah a kou hi. Hitah ah jong Abram ginna peen a loupi mahmah hi. Achiabna diing lam jong helouin a ji toh a gante toh Pathian kouhna lam helouin ahung kipandohta hi. Hitah ah Pathian a ginna peen ataha hung seemin ahung pawtdohta hi. A nu leh pate taisanin Pathian kouhna lam ahung juanta hi. Hitah a Pathian a ginna leh a tahnanna subuchingin I innkote apatin ahung pawtkheta hi. Bible a Ginna Pa chia kiheetna jong Pathian a gintaatna leh tahnanna jiah a amah a hung kipiahdohna ahih a gintaat huai hi. Tuni tannin ei gingtute adiingin ginna a ipa uh ahung hi jing hi.

Unau, tuin nang jong Pathian in na ginna bang chibang ahiai chih ahung enkhe jing hi. Na gintaatna mai huntaw na chi ahi meithei hi. Hilejong dawite'n jong agingta va, huleh lauin akiliing uhi chiin (Jakob 2:19) ah akimu hi. Pathian khat chauh aum gingta mai ahun lou ahi chih I gintaat peenkhuuh a natoh, silbawlin a jui diing ahi. Tuhun in eite'n I ginna uh bangin i sulang viai? I ginna chu silbawl asulang diing ihihleh amah bia a i paahtawi diing

hilou ahiai mah? Pathian biaahna kikhopte, Bible simte, haamtei jingte a ahung siampa I gintaat leh i bawl diing hih ahi. Hun nunung ah ei Khristian kichite I uut uut ut un i hinkhua i jang mei uhi. Kihop daahte, khuangte hun loupi I zat chianga zong Pathian ngaihsahlouna bouruak neeh leh dawn, anuam leh ei uut zong chauh a I um jing leh I aw chiangin I bawlkhial kha diiga ikisiih chiangin lah akikheelta diing hi. Unau nang jong tuin Lalpa amah na gintaatna chauh hiloua a natoh toh mah a diinga kipe diingin hun hoih a hung pe nalai ahi. Chih he in I dinmun apatin Lalpa kawm lam juan chiat diingin Lalpa minin ikichial ahi. Lalpa'n a thu a chinglou avaal aum leh hung ngaidam henla adih leh Lalpa a I ginna isuh buching chiat theihna diingin a thu hung gualjawlta hen. Amen.



Pharisaite laha mi, a min Nikodem kichi, Judate vahawmtu khat a um hi. Amah chu jaan in Jesu kawmah a hung a, a kawmah, "Rabbi , Pathian apat a thuhilhtu diinga hung na hi chih ka he uhi; ajiahchu Pathian a kawma a um louh leh, na chiamchihna silmah bawlte koimahin a bawl thei sih diing," a chi hi.

Jesu'n adawng a, a kawmah, "Chihtahzeten, chihtahzeten ka hung hilh ahi, mi koipouh in apian thah louh leh, Pathian lalgam a mu sih diing hi," a chi hi. Nikodem in a kawmah, "Mi a teeh nungin bangchiin apiang thei diai? A nu sunga luutkiitin apiang thei diing maw?" a chi hi.

Jesu'n adawng a, "Chihtahzeten, chihtahzeten ka hung hilh ahi, mi koipouh tui leh Hagau apat apian louh leh, Pathian lalgam ah a luut sih diing hi.

Johan 3:1-5

HOPE BAPTIST CHILDREN HOME SUM A PANPIHNA SILPIAH MUHDAAN

JUNE – 2021 (PAWL)

Sl.No.	Names	Address	Rs.
01.	NTBC, Tangnuam	Tangnuam	Rs. 1000.00
02.	NTBC, V. Munhoih	Munhoih, New Lamka	Rs. 2000.00
03.	NTBC, Joutung	Joutung	Rs. 2000.00
04.	NTBC, Simveng	Simveng	Rs. 2000.00
05.	NTBC, Bible Hill	Rengkai	Rs. 5000.00

JULY – 2021 (PAWL)

06.	NTBC, Joutung	Joutung	Rs. 1000.00
07.	NTBC, T. Mimjang	Mimjang	Rs. 4000.00
08.	NTBC, Simveng	Simveng	Rs. 2000.00
09.	NTBC, Chiangkawn	Chiangkawn, Phailian	Rs. 6000.00
10.	NTBC, Bible Hill	Rengkai	Rs. 5000.00
11.	NTBC, Khuangnung	Khuangnung	Rs. 3000.00

AUGUST – 2021 (PAWL)

12.	NTBC, Joutung	Joutung	Rs. 1000.00
13.	NTBC, Tangnuam	Tangnuam	Rs. 1125.00
14.	NTBC, Pamjaal	Pamjaal	Rs. 880.00
15.	NTBC, Suangdai	Suangdai	Rs. 1000.00
16.	NTBC, Lungthul (L)	Lungthul (L)	Rs. 1000.00
17.	NTBC, Bible Hill	Rengkai	Rs. 1000.00
18.	NTBC, Sumtuh	Sumtuh	Rs. 2000.00
19.	NTBC, Imphal	Imphal	Rs. 15000.00
20.	NTBC, V. Munhoih	Munhoih, New Lamka	Rs. 4000.00
21.	NTBC, Simveng	Simveng	Rs. 2000.00
22.	NTBC, Bible Hill	Rengkai	Rs. 5000.00

JUNE – 2021 (MIMAL)

Sl.No.	Names	Address	Rs.
23.	Langkothang Hangnung	Simveng	Rs. 4730.00
24.	Niinghau	Beulahlane	Rs. 2000.00
25.	Neelzavung	Beulahlane	Rs. 500.00
26.	Vunggou	Rengkai Road	Rs. 1000.00

JULY – 2021 (MIMAL)

27.	Vunggou	Rengkai Road	Rs. 1000.00
28.	T. Lalkhoneeh	Simveng	Rs. 3000.00
29.	Rev. K. Hangnung	Simveng	Rs. 300.00
30.	Rev. Th. Khamminthang	T. Mimjang	Rs. 300.00
31.	Sh. Khupminthang	Khuangnung	Rs. 300.00
32.	Th. Thangchinpao	Tangnuam	Rs. 300.00
33.	Rev. B. Suahthianlal	Bible Hill	Rs. 300.00
34.	Rev. Th. Thangzasiam	Bible Hill	Rs. 300.00
35.	Rev. P. Suanthang	Singngat	Rs. 300.00
36.	Rev. L.V. Thanga	Joutung	Rs. 300.00
37.	Rev. H. Kamkhanlal	Munhoih	Rs. 300.00
38.	Pastor S. Khaizalal	Thanlon	Rs. 300.00
39.	Pastor T. Chinlamthang	Leijangphai	Rs. 300.00
40.	Rev. Thangkhanlal Hangluah	Dumsau	Rs. 300.00
41.	Rev. Lunminthang	Simveng	Rs. 300.00
42.	Rev. Th. Pauzam	Simveng	Rs. 300.00
43.	Rev. P. Khamthianmang	Zogam Road	Rs. 600.00
44.	Th. Siam Simte	Munhoih	Rs. 1500.00
45.	S. Lamkhanlun	Munhoih	Rs. 600.00
46.	B. Soichinlam	Zion veng	Rs. 300.00
47.	L. Ginsuanmung	V. Munhoih	Rs. 300.00
48.	Kamthansang	Zion veng	Rs. 300.00
49.	H. Kaiminlian	Khominthang	Rs. 300.00
50.	S. Khupchinhau	Suongpeehmun	Rs. 300.00

AUGUST – 2021 (MIMAL)

51.	Nelzavung	Beulahlane	Rs. 500.00
52.	Sh. Tunzapau	T. Mimjang	Rs. 100.00
53.	Donhoihkim	Simveng	Rs. 500.00
54.	Hoihkim	Tuibuang	Rs. 500.00
55.	Vunggou	Rengkai Road	Rs. 1000.00
56.	Lamzatun	Joutung	Rs. 100.00

AUGUST 2021 HA SUNGA HBCH VAN A SILPIAH MUH DAAN

SL. No.	Name	Address	Items
1.	Hahaat	Zion veng	Beguul 137 pieces
2.	NTBC Bible Hill Numei pawl	Bible Hill	Rice 190 kgs
3.	Grace Niangneihaat	Zogam Road	Bottle Gourd(uum) 2 pcs
4.	NTBC, Numei Pawl	Khuangnung	Rice 50kgs,Maiyah, beteh, mateh,beguul,tangkha,uum, Lamkhuang
5.	NTBC, Tuibuang	Tuibuang	Rice 60kgs
6.	Nu Chiinnejlam	Zion Veng	Egg 1plate
7.	NTBC,Simveng	Simveng	Vegetables,tangmai, lengthei, etc. Haithah lopna haichi teng.
8.	Village Authority	Bible Hill, Rengkai	Rice 10 kg
9.	T.Lammminthang Simte	T.Mimjang	Chini 14kg, Surf 4kg, Salt 5kg, Chapati 1kg
10.	T.Vummminthang	Tangnuam	Rice 50kg,
11.	L.Nangdoupau	Simveng	Rice 50kg

12.	NTBC	Suangpeeh Mun	Tangmai pum 51, mautu-ai cement bag khat
13.	Mr. Thangvel H/o. Chinzahoih	Zogam Road	Rice 50 kg
14.	NTBC	Lunghthul (L)	Haithah Lopna haichi teng
15.	NTBC	Thanlon	Meh diing bag khat
16.	NTBC	Tangnuam	Haithah lopna meh bag khat
17	NTBC	Joutung	Meh bag khat, Tangmai 21 pcs
18.	NTBC	Tuibuang	Rice 56 kgs

THANK YOU NOTE

Amasa pen in Khrist a unau deihtahte Lalpa Jesu Khrist min in chibai, HBCH tungtawn a Pathian lalgamma i sep uh tuni tan a paitou jel in nangun jong phatuamngaihna hung suah tou zel in silpiah ah, sum le pai ah, haamteina ah na hung pang siau siau nate uh jaal in Pathian ka phat a, na tungvah kipaah thu ka hung gen hi. Maban ah jong tagah genthei te somdawl tou thei jeel diing in Lalpa'n petute jousiah aleh tampi in hung malsawmta hen.

Kipah ing. Pathain

lalgam a nasep pih uh.

Rev. Th. Thangzasiam,
Home Father HBCH

*“Hinna Thah a article, sermon,
biography suah nuamte diing in a
suah theijing hi.”*



BOOK POST

(**PRINTED MATTER**)

POSTAL REGD. NO. MNP-60

To.

.....
.....
.....
.....
.....
.....
.....
.....

PIN

If undelivered return to:

New Testament Baptist Churches Association

Regd no. 1192 Of 1973 Under Society Act XXI of 1860
Post Box - 45 Bible Hill, Rengkai
Churachandpur - 795128, Manipur, India.